

# Pesisir pantai Terengganu berisiko

Terdedah masalah hakisan akibat perubahan iklim dunia

**KUALA NERUS** – Kementerian Sumber Asli dan Alam Sekitar tidak menolak kemungkinan pesisir pantai sepanjang 244 kilometer di seluruh negeri ini berpotensi mengalami masalah hakisan berikutan perubahan iklim dunia.

Menteri, Datuk Seri Wan Junaidi Tuanku Jaafar berkata, ketika ini terdapat beberapa kawasan pantai dikenal pasti mengalami hakisan teruk termasuk pantai Tanjung Gelam, Kuala Nerus; pantai Teluk Lipat, Dungun; pantai Kemasik, Kemaman dan sebagainya.

“Belakangan ini masalah hakisan agak membimbangkan yang mengakibatkan kita mengalami kehilangan pantai yang agak banyak. Fenomena

ini didorong perubahan iklim dunia hingga menyebabkan perubahan cuaca dan laut, sekali gus menjadikan kawasan pesisir pantai begitu terdedah dengan hakisan.

“Bagaimanapun, kerajaan sentiasa prihatin dengan masalah dihadapi rakyat. Beberapa langkah segera telah diambil bagi mengatasi masalah hakisan di negeri ini agar tidak menjadi lebih teruk,” katanya sebaik selesai melakukan lawatan ke tapak Projek Mencegah Hakisan Pantai di pantai Tok Jembal, semalam.

Menurut Wan Junaidi, peruntukan segera sebanyak RM13 juta disalurkan untuk melaksanakan projek menangani hakisan di beberapa pantai di negeri ini yang terjejas teruk.

Katanya, semua projek berkenaan akan dilaksanakan Jabatan Pengairan dan Saliran negeri; melibatkan peruntukan sebanyak RM3 juta bagi pantai Tanjung Gelam, Kuala Nerus (RM3.5 juta); pantai Rusila, Marang (RM3 juta), pantai Bukit Keluang, Besut (RM1 juta) dan pantai Kemasik, Kemaman (RM2 juta).

“Kita jangka projek ini akan siap sepenuhnya sebelum memasuki musim tengkujuh tahun ini,” katanya.

Sementara itu, beliau turut mengingatkan semua pihak yang terlibat dalam projek pembangunan di pesisir pantai, agar membuat kajian secara terperinci bagi memastikan tidak mengganggu ekosistem laut.



Wan Junaidi (kanan) ketika mengadakan lawatan di Pantai Tok Jembal.